



6. marts 2017

UPA 2017/161

Inatsisartut suleriaasianni § 33 naapertorlugu aalajangiiffigisassatut siunnersuut manna saqqummiuppara:

Inissianik attartortitsinermit isertitanik, maanna konto pingaarnermi 72.10.16 Inissiat attartortittakkat ingerlanneqarnerat iluanaarutisiatut immikkoortinneqartunit isertitat ukiuni tallimani annikilliarortillugit isumalluutaajunnaarnissaat pillugu Naalackersuisut peqquneqarnissaannik Inatsisartuni aalajangiiffigisassatut siunnersuut.

(Inatsisartunut ilaasortaq Bendt B. Kristiansen, Inuit Ataqatigiit)

Tunggavilersuut

Ukiut tamaasa pisortat inissiaataasa attartortinneqartut akiisa aalajangersarneqarnerannik ajornartorsiutit qaqilerneqartuarpot, taamaammallu Inuit Ataqatigiinnit siunnersuummik saqqummiussivugut.

Attartornermut peqqussutip ilusilersorneqarnera naapertorlugu pisortat attartortittakkanik inissiaataani attartortut inissiap sananeqarnerani aningaasartuutip 1,5 procentia piginnittumut iluanaarutit akiliutigisarpaa, taannalu politikikkut tulleriaarinerni nalinginnaasuni piginnittut atorsinnaavaat.

Siunissami inissianut akiliutit ineqarnermut immikkoortuni ataasiakkaaniiginnarneqartittarnissaat, ineqarnermullu immikkoortuni ataasiakkaani aningaasaleqqinnernut atorneqartarnissaat, taamaallitullu ineqartunut iluaqutaasumik atorneqartarnissaat siunnersuummi uani siunertarineqarpoq.

Inatsisartut Ombudsmandiata 2002-mili 2001-imut nalunaarusiornermini qupperneq 30-mi (qallunaatuuni) pisortat inissiaataanni ineqarnermut akiliummut ilaatillugu iluanaarutininik akiliisitsisarneq tunggaviusumik inatsimmit isigalugu akileraarutit isigineqarsinnaasoq erseqqissaatigaa. Pisortat inissiaataanni attartortittakkani attartortuuneq pissutigalugu akileraarutininik akiliinerusoqartariaqanngitsoq isumaqarpunga. Soorunami ullormit ullormut aningaasat pisariaqartinneqartut aningaasanut inatsimmi imaaliallaannarluni nanineqarsinnaanngillat, ukiunili tallimani annikilliarortitsinissamik aalajangernikkut inuuniarnikkut nalimmassaanerup taassuma pingaarnersiorneqarnera pisinnaasoq naatsorsuutigaara.

Peqqussutip misissorluarnerani ineqarnermut immikkoortut missingersuutaat taamaallaat ineqartut ineqarnermut akiliutaannik toqqammaveqartartut ersarippoq, tassanngalu ingerlatsinermit, sillimmatinut, piginnittunut iluanaarusiineq, nalinginnaasumik aserfallatsaaliineq, pilersaarutaasumik piffissamilu aalajangersimasumi aserfallatsaaliineq nutarterinerillu il.il. isumagineqartarput. Piginnittullu (pisortat) arlaatigulluunniit ineqarnermut immikkoortunut aningaasartuuteqarnissamik sukkulluunniit pisussaaitaaffeqannginnerat maluginiarneqanngitsoorsinnaanngilaq.

Inissianik attartorneq pillugu Inatsisartut peqqussutaat nr. 2, 12. maj 2005-imeersoq allangortinneqartariaqartoq, taamaallunilu inissianik piginnittut annertunerusumik pisussaaffilerneqartariaqartut Inuit Ataqatigiinni isumaqarpugut.

Aningaasatigut allaffissornikkullu pisortanut kinguneqaatit

Massakut konto pingaarneq 72.10.16 Inissiat attartortittakkat ingerlanneqarnerat, aningaasaliissutinit iluanaarutit 37 mio. kr-it immikkoortinneqarput. Aningaasat taakku ukiuni tallimani annikilliertortinneqarpata, ukiuni tallimani ukiumut 7,4 mio. kr-it nassaarineqartassapput, katillugit 37 mio. kr-it.

Siunnersuutip aningaasanut inatsimmut ukiunullu tulliuuttunut missingersuutitut ivertinnera Aningaasaqarnermut Naalackersuisoqarfimmut annertunerusumik aningaasartuutaasussatut naatsorsuutigineqanngilaq.

Aningaasatigut allaffissornikkullu namminersorlutik inuussutissarsiortunut kinguneqaatit

Siunnersuut sineriammi iluarsartuussinernut aserfallatsaaliinernullu suliaqarnerulernermik kinguneqassaaq. Tamatuma amerlanerusut suliffeqalernerannik kisalu namminersorlutik inuussutissarsiortut tamatuma nassatarsiaanik aningaasanik kaaviiartitsinerulernissaat nassatarissavaa.

Aningaasatigut allaffissornikkullu innuttaasunut kinguneqaatit

Inuit akiligassaminnik angummanniapiloortut aningaasanik atugassaqarnerulernissaat matuma nassatarissavaa.

Sineriammi sulisussatut pisariaqartinneqartut amerlanerulerpata inuit amerlanerusut suliffeqalissapput.